

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNO TUŽILAŠTVO-TUŽITELJSTVO
ZENIČKO-DOBOJSKOG KANTONA**

Broj : T04 0 KT 0045430 21

Zenica, 31.08.2021. godine

OPĆINSKOM SUDU U ZAVIDOVIĆIMA
-Sudiji za prethodno saslušanje-

Na osnovu člana 45. stav 2. tačka i) u vezi sa članom 241. Zakona o krivičnom postupku F BiH, p o d i ž e m

O P T U Ž N I C U

Protiv:

1.STARČEVIĆ ELVIRA, iz Zavidovića, neosuđivan,

2. MUJKIĆ SABAHUDINA, iz Zavidovića, neosuđivan,

što su,

1. Starčević Elvir

Tačno neutvrđenog dana u mjesecu junu 2020. godine, na području općine Zavidovići, radeći na prikupljanju potpisa podrške za prijavu političke stranke ili nezavisnog kandidata, u konkretnom slučaju za politički subjekat „Građanski savez“, odnosno njihovog kandidata za načelnika općine Zavidovići, Dž. Z., izradio lažne isprave, na način da je u obrasce za prikupljanje potpisa podrške za prijavu političke stranke ili nezavisnog kandidata upisivao podatke i potpise za osobe bez prava glasa, odnosno umrle osobe, i to na četiri obrasca, lažne podatke i potpise za: K. E., JMB: ..., broj važeće lične karte ..., koji je umro 16.04.2020. godine, M. Z., JMB: ..., broj važeće lične karte ..., koji je umro 04.01.2018. godine, M. Z., JMB: ..., broj važeće lične karte ..., koji je umro 11.09.2018. godine i B. R., JMB: ..., broj važeće lične karte ..., koji je umro 31.03.2017. godine, iako je znao da ove osobe nisu žive nakon čega su ovako lažno sačinjeni obrasci, dostavljeni uz prijavu za ovjeru političke stranke za učešće na lokalnim izborima 2020. godine Centralnoj izbornoj komisiji-Središnjem izbornom povjerenstvu Bosne i Hercegovine,

2. Mujkić Sabahudin

U isto vrijeme, na istom mjestu, u istu svrhu, a na način opisan u tački 1. izradio lažnu ispravu na jednom obrascu u koju je upisao podatke i potpis osobe bez prava glasa, odnosno umrle osobe i to: Z. M., JMB: ..., broj važeće lične karte: ..., koji je umro 07.05.2018. godine, iako je znao da ova osoba nije živa, nakon čega je ovako lažno sačinjen obrazac, dostavljen uz prijavu za ovjeru političke stranke za učešće na lokalnim izborima 2020. godine Centralnoj izbornoj komisiji-Središnjem izbornom povjerenstvu Bosne i Hercegovine,

čime je Starčević Elvir počinio produženo krivično djelo krivotvorenje isprave iz člana 373. stav 2. u vezi sa stavom 1. u vezi sa članom 55. KZ FBiH, a Mujkić Sabahudin krivično djelo krivotvorenje isprave iz člana 373. stav 2. u vezi sa stavom 1. KZ F BiH.